

# Suttascripziun dal «Pacte Multimédia»

■ (cp) **La SRG SSR idée suisse, il Secretariat da stadi per furmazion e perscrutaziun, l'Uffizi federal da furmazion professiunala e da tecnologia e la Conferenza svizra dals directurs chantunals da l'educaziun publica han suttascriu il «Pacte Multimédia» cun l'intent da promover comunablamain l'innovaziun, la perscrutaziun scientifica da las medias e la furmazion.** La cunvegna ha duas finamiras: ella vul premiar en il rom d'ina concurrenza las meglras ideas sin il champ da la multimedia e crear ina plattafurma d'internet che accumpogna ils visitaders tras il mund digital.

La Svizra fa il pass en l'era da l'infurmaziun. Questa midada ha consequenzas per las tecnologias, ma er per l'economia, las plazzas da lavur, la perscrutaziun, l'infurmaziun, l'intermediaziun da savida, la scolaziun e las activitads da temp liber. En quest vast process da digitalisaziun gioga la SRG SSR idée suis-

se ina rolla fitg impurtanta. Ensemen cun ses partenaris vul ella promover l'innovaziun en Svizra e facilitar l'access da mintgina e mintgin als cuntegns audiovisuals, cun explitgar e decodiar las tecnologias d'infurmaziun ed accumpagnar la digitalisaziun da noss pajais.

## **Il «Pacte Multimédia» sa basa sin dus projects**

Il «Prix Multimédia» è ina concurrenza averta a tut las personas che vivan en Svizra ed a las Svizras ed als Svizzers a l'exteriur. Il premi vegn surdà per projects che – sa distinguan tras innovaziun tecnologica e creatividad publicistica (p. ex. novas pussaivladads d'utilisaziun participativas ed interactivas, adattadas als interess persunals, moniturs multipels, novas furmas audiovisualas, etc.) – èn accessibels a tuts e gidan uschia a reducir il foss social sin il sector da la multimedia.

Il premis èn dotads cun 50 000 e 25 000 francs e duain

gidar a realisar ils projects distinguids. Ultra da quai vegnan ils projects preschentads a moda cumplexsiva en il radio, la televisiun e sin las paginas Web da la SRG SSR idée suisse. La giuria vegn a sa cumponer da persunalitads da renum dals secturs tecnologias d'infurmaziun, furmazion e medias.

## **Il reglament da la concurrenza sin [www.pactemultimedia.ch](http://www.pactemultimedia.ch)**

Ina plattafurma d'internet quadilingua preschenta las contribuziuns da radio, televisiun e multimedia da la SRG SSR idée suisse ch'èn relevantas per questa tematica. Ultra da quai duain ils dossiers tematics esser ina sort da guid per «surviver» en il labirint digital (explicaziuns davart las novas tecnologias d'infurmaziun, dumondas davart lur utilisaziun, davart las ristgas, etc.).

Igl è previs da surdar il «Prix Multimédia» e da lantschar la plattafurma il december 2007 a chaschun d'ina sairada festiva.